

Mud Volapüka

Nüm 8

27 mayul 2016

Pükedavöds netas vola

Spikets Tsyinänik

If binoböv pöfikan — no cütobös, if binoböv liegikan — no binobös pleidälik.

Tuigüls no ofilons nen fil.

Men sublimik no memon badi vönädik.

Nilädans nilik binons gudikum ka röletans fagik.

Veg neverätik te dabinon, ab stad nenspelik no dabinon.

Vifiko maifükobös logis, nevifiko maifükobös mudi.

If ädunoböv dunotis tugöfik ünü yels kil — nemödikans onolons tefü atos; if balna idunoböv dunot badik — vol lölik ulelilon atosi.

Pö täv lunik päkem leitik no dabinon.

Ai nolobös miedi okik.

Lampad geilük litastralon fagiko.

Mug faemik kanon fefidön kati igo.

Fil lunüfik düfükon stali.

Flen nen def no dabinon; if osukoböv defi — ublebob oki nen flen.

Flenam pistuköl pro fien no binon sufidik.

If ipoloböv ön veg täno okanob gekömön; if ipoloböv ön vöd — nosi okanob verätükön.

If dotoböv tefü meni täno no dunobös jäfoti kobo atan, ab if dunoböv jäfoti kobo atan — no dotobös.

If laboböv moni e vini — i flens usüikons.

E buid labon maifodis, e völ labon lilis.

Igo bel geilik no kanon säjadön soli.

Igo pro bakaston idofalöl del usüikon ven ugüflekoy oni.

De nest krovik no mögos ad getön nögi gokik.

Me tuigül bal binos fikulik ad filükön fili.

Nendemü vio nämiko vien lebladon, bel no ubiegädon pro on.

Ven labob vini tikobös suvikumo tefü tim ven no olabob oni.

Lampad no litastralon oki.

Binos gudikum ad spikotön ko sapan ka lekomipön ko stupan.

Binos gudikum ad filogön logodi ka fililön pösodanemi.

Me cüd smalik no mögos ad decöpön tuigi gretik.

Vol binon so gretik das no binos das seim no dabinon.

No nofikoy demü plüt plumafik.

No drenobös das no nolob, drenobös das no lärnob.

If no ulöädoböv su bel — no usevedikob geili sila; if no unexänoböv ini gufur — no usevedikob bigoti tala.

Daif e zäl soiks no dabinons kel no finikons.

If elenükoböv jukis nulik täno tovobös futis geilikumo.

Me mon kanoy remön gloki ab no kanoy remön timi.

Adelo no mögos ad büologön gödi odelik.

Pro utan kel speton igo minut jinon laidüpu.

Pro utan kel pladikon in säkäd valikos jinon dagu, pro utan kel pladikon e lülogon plödü säkäd valikos binon kleilik.

Utan, kel jonon obe defis obik, nezesüdo binon neflen obik; utan, kel nunon obi tefü tug obik, nezesüdo binon flen obik.

Binos fasilik ad seividön modis mil, binos fikulik ad dagetön fijeni bal.

Filogön binon gudikum ka fililön, finolön binon gudikum ka filogön, duinön binon gudikum ka finolön.

Fit pidäsinon su völ labon te logi bal.

Kleudan imofugon ab lepädöp no umofugon.

Janed gudik no kanon plaükön fidedi gudik.

Can gudik no binon nejerik, can nejerik no binon gudik.

Härod no fidon miti härodik.

Men nen viläl sümedon neif nen stal.

Dunobös oti kel spikob.

No penobös penedi ön lezun.

Nig badikün binon gudikum ka mem gudikün.

Liev visedälik labon segolöpis kil de sep.

Krovs binons blägik valöpo.

Pisälil jiedota mugik dämükon cafädi büla.

Labiäl fidon de bovül ab logon ini cafäd.

If risat komonöv — mögos ad kükön büli.

Ton pakon mö els ,市里' mil (el ,市里' [,li'] binon maf vegäda Tsyinänik vönik), fam pakon mö els ,市里' degmil.

Fel badik no dabinon, mens badik te dabinons.

No lügobös das no labob diniti (geiläti), lügobös das no labob

täleni.

Tifam primikon de tif beba (läfa).

If fidoböv lemödöti (vemo) — no gutob, if spikoböv lemödöti —
vöds olabons völädi smalik.

Blufölo dibi bluka no dunobös atosi me lögs bofik.

Pöfi no mögos tegön, benolabi no mögos skretön.

Sevols-li, das ... Brasilän



1) Zif el ‚Brasília‘ binon cifazif Brasiläna sis yel 1960 e pibumon tüpü yels kil e laf fa bumans mäldegmil. Zifs gretikün votik – el ‚Rio de Janeiro‘ ed el ‚São Paulo‘. Zif gretik alik Brasiläna pazüon fa slöms (els ‚favela‘).



2) Dötums vegdegfol e laf lödanas Brasiläna nitedälons futaglöpädi. Kvip futaglöpädik Brasiläna binon kvip balik kel ibekomon mätedis bevünetik valik e binon fokomipan vola lulnaik. Tö zif alik Brasiläna stadion futaglöpädik nemu bal dabinon, Brasilän labon mödoti gretikün stadionas pö vol.



3) I Brasilänans löfilons danüdis. Ün febul tö zif el ‚Rio de Janeiro‘ karnaval (karneol) famik jenon kel dulon dels fol. Brasilänans mödik tuvons vobi pö ut.



4) Jäst el ‚OK‘ tö Brasilän sinifon zun e fäk e labon patöfi lunoföfik.



5) Kafi piblinon lü Brasilän te ün yel 1727. Do kaf gudikün piprodon tö Brasilän, ab Brasilänans buons kaki.



6) Tõ zif el ‚Rio de Janeiro‘ sis dyp 22 soara jü dyp 5 göda vabistirans kanons dutävön ön red dakosädalitõma. Atos yufon disõn riskädi beravama toodik, bi neito põ süts binos vemo riskädik.

7) Ven Brasiläna spikon „Ba“ atos sinifon „No“. Ven Brasiläna spikon „Kosgolob ya [lü plad kobanefa]“ atos sinifon „Segolob de dom“. Ven Brasiläna spikon „Unükömob latikumo“ atos sinifon „Ukömob neai“.

8) Brasilänans binons vemo leklinik. Lödadoms Brasilänik mödik labon banacemis kil.

9) Brasilän binon davedöp susvogädijonana jiel ‚Gisele Caroline Bündchen‘.



Grandene

Lerät

Danmarkänans löfilons spikön: „Pö obs, tö Danmarkän, valikos binon gudikum ka tö Svedän — klimat, nat, net, jenav ... e te balat balik binon pö Svedänans gudikum.” Kis atos?

Tuvedot: in nüm sököl.

Tuvedot leräta se nüm büik:

Hiel ‚François Rabelais‘ ififegebom moni okik lölik (mon omik süpiko ifinikon) e sekü atos no äkanom fövön tävi okik ad gekömön lü zif ‚Paris‘. Iposbinükom päkilis papürik kil at tö spad sienovik dat loatäb lotidöpa üsienon onis ed üsienon tefü ons poldanefe. Poldanef ifanäbükon ed iveigükon omi sa päkils lü cifazif ‚Paris‘ ad vestigön ploti ta reiganef. Us hiel ‚François Rabelais‘ imaifükom päkilis at ed ififedom viven de ons kel äbinon te jueg nendämik. Somo (me mod somik) hiel ‚François Rabelais‘ glatiko ilükömom tö ‚Paris‘.

Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».